

Pesilat Kelantan bimbang

MASALAH banjir mungkin menghalang skuad silat Kelantan menjalani latihan giat menghadapi Kejuaraan Silat Kebangsaan, di Melaka, bermula 24 November ini.

Kebimbangan itu dilahirkan oleh jurulatihnya, Mohd Noor Mahmud, memandangkan banjir lazimnya melanda Kelantan antara pertengahan bulan depan dan Disember.

Menurutnya, jika hujan dan banjir melanda negeri itu pesilat-pesilat yang kebanyakan dari luar Kota Bharu, sudah pasti

sukar untuk menjalani latihan dengan lebih sempurna.

"Saya mula resah sekarang. Jika banjir besar melanda Kelantan seperti tahun lalu, kami terpaksa menarik diri," katanya, semalam. Tahun lalu, banjir besar melanda Kelantan pada pertengahan November.

Mohd Noor yang juga jurulatih kebangsaan, berkata setakat ini latihan biasa sudah berjalan dan latihan giat akan bermula awal bulan depan.

Katanya, latihan mungkin tergendala jika hujan lebat berterusan

dan banjir.

A. Harlan (M)
Sedangkan, Kelantan yang merajai naib juara musim lalu, begitu bersemangat-sungguh untuk merampas gelaran juara keseluruhan dari Selangor. Ia pada tahun lalu memenangi tiga pingat emas dan dua perak, berbanding Selangor dengan enam pingat emas dan empat perak.

Tahun ini, Kelantan akan diketuai oleh pemenang pingat perak Sukan SEA XV, Azam Haji Abbas dan tiga pesilat kebangsaan; Wan Amizah Wan Ahmad, Wan Adnan Wan Isa dan Basri Abdul

Rahman.

Bagaimanapun, Mohd Noor berkata beberapa muka baru yang setanding dengan pesilat kebangsaan itu dijangka berupaya menguasai kejuaraan di Melaka nanti.

Katanya, keupayaan beberapa pesilat wanita juga mula meningkat berikutan kejayaan Wan Amizah.

"Saya percaya jika masalah banjir dan hujan lebat berterusan tidak mengganggu latihan, Kelantan mampu mengungguli kewibawaan Selangor," katanya.

16 OCT 1989